

des irlüchtigstein fursten marcgrafen Wilhelms czu Mizens gegunst habin, das man das hûs, daz do heiset das Fuchshoel, das der kyrchin czu Mizens rechte eygin ist, abebrochen hôt, vnde wir haben das durch gemeyns nuczczes willin des landes, der stât vnde der kyrchin czû Mizens lozen abebrechen, alzo das di° hofestad, do das selbe hûs, das Fuchzhoel, offegestandin hât, czû eyner gemeyn strazze vnde wege gegeben habin. Vnde man sal auch fortmer an die stat keynen bûw seczczin, nach keyn hûs doroff, noch do hyn yn keyne weis wedir kleyne noch groz bûwen seczczin noch machin. Dez hât vns der gancze rât der stad czû Mizens gelobit vnde gereth eyne mÿre an der seyten, die do leit kein der stad, von gründe off zcû vâren vnde czû machin vnde si° czû behalden in yrem wesin, vns egnanten techande vnde dem° ganczin capitele czu wedirstatunge, dem° ganczin lande vnde der stad czû Mizens czû nûcze vnde czû vrômen. Ouche sage wir si° quÿd, ledig vnde lôz in desim brieue der fyÿr schok grosschin, die sy° vns solden gebin vor das hûz, daz off der hofestat stunt, genant daz Fûchzhoel. Das das ewiclichin alzo blibe vnde gehaldin werde, dez czû orkunde habe wir vnsers capitels ingesigil wyssintlich an disen brieff lazen hengen, der gegeben ist czû Mizens noch gots gebort driczenhundert iar dor noch in dem° sebin vnde achtezigistin iare an der heiligen ewelfbotin tage Philipi Jacobi.

Nach dem Orig. im Rathsarchiv zu Meissen. Das an einem Pergamentstreifen befestigt gewesene Siegel des Capitels fehlt.

### No. 59. 1387. 10. Juli.

*Bürgermeister und Rath geloben, da sie und die Stadt vom Markgrafen Wilhelm zu Leibgedinge seiner Gemahlin Elisabeth verschrieben worden, eintretenden Falls dieser treu und gehorsam zu sein.*

Wir burgermeystir rete vnde dy gancze gemeyne der stad zcu Myzsin bekennyn —, daz vnz vnde dy stad der hochgeborn furste vnde herre er Wilhelm marcgrafe zcu Myszin vnser gnedigir herre an dy hochgeborn furstinne frouwin Elizabeth marcgrafynnyn zcu Myszin syner elichin gemalen vnser gnedigin frouwin zcu eyne rechtin furstlichin lypgedinge gegeben vnde gemacht hat, vnde vnz an sy in rechtis furstlichis lipgedingis wize hat gewizit, darvme wir williclichin globyn vor vnz vnde alle vnser nockomen gemeynlichin by den eydin, dy wir yr liplichin zcu den heyligin gesworn habin, ab sich daz vor vyle, daz got lange wende, daz wir der vorgnantin vnser gnedigin frouwin Elizabeth vnde zcu yrer hant dem hochgeborn furstin vnde hern ern Jostin marcgrauyn vnde hern zcu Merhern mit der vorgnantyn stad zcu Myzsin myt allin rechtin eryl nuczyn vryheytin gewonheyntyn vnde zcu gehorunge, alz wir bis her gesessin vnde komen sin, in rechtis lipgedingiz wize alz furstinnen recht vnde gewonheynt ist wartin gehorsam vnde vndirtenig sin wollyn alz vnser rechtin erbe frouwin an geuerde vnde an argelist alle dy wyle sy lebit in alle der mazse, alz das des egnantyn ern Wilhelms vnsers gnedigin hern bryffe dy her ir darubir gegeben hat vs wizin vnde lutin. Daz wir daz stete gancz vnde vnuorrukt haldin wollin, habin wir vnser stad ingesigil vor vnz vnde alle vnser